

Embargo: Hanya boleh diterbitkan atau disebarikan mulai jam 1200, Rabu, 13 November 2024



KENYATAAN MEDIA

KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

PERANGKAAAN DEMOGRAFI MALAYSIA, SUKU TAHUN KETIGA 2024

KADAR PERTUMBUHAN PENDUDUK MENURUN KEPADA 1.6 PERATUS SEIRING DENGAN PENURUNAN BILANGAN KELAHIRAN 12.3 PERATUS PADA SUKU TAHUN KETIGA 2024

PUTRAJAYA, 13 NOVEMBER 2024 - Jabatan Perangkaan Malaysia telah mengeluarkan laporan berkaitan Perangkaan Demografi yang memaparkan data kelahiran hidup, kematian dan penduduk bagi suku tahun ketiga 2024.

Mengulas laporan tersebut, Ketua Perangkawan Malaysia, Dato' Sri Dr. Mohd Uzir Mahidin menyatakan, "Penduduk Malaysia pada suku tahun ketiga 2024 dianggarkan 34.1 juta berbanding suku tahun ketiga 2023 (33.6 juta) dengan pertumbuhan yang lebih perlahan sebanyak 1.6 peratus berbanding 2.1 peratus (ST3 2023). Pertumbuhan penduduk yang perlahan ini adalah seiring dengan penurunan bilangan kelahiran dalam tempoh yang sama. Jumlah penduduk terdiri daripada 30.7 juta (90.0%) Warganegara dan 3.4 juta (10.0%) Bukan Warganegara. Penduduk lelaki meningkat kepada 17.9 juta daripada 17.6 juta pada suku tahun ketiga 2023 dan penduduk wanita meningkat kepada 16.2 juta daripada 16.0 juta dalam tempoh yang sama. Nisbah jantina keseluruhan penduduk ialah 111 lelaki bagi setiap 100 perempuan manakala nisbah jantina bagi Warganegara ialah 103 lelaki bagi setiap 100 perempuan. Penduduk umur muda (0-14 tahun) kekal tidak berubah pada 7.6 juta (22.2%). Sementara itu, komposisi penduduk umur bekerja (15-64 tahun) dan

penduduk tua (65 tahun dan lebih) masing-masing meningkat daripada 23.5 juta (70.0%) dan 2.5 juta (7.5%) kepada 23.9 juta (70.2%) dan 2.6 juta (7.7%) pada suku tahun ketiga 2024”.

Melayu menyumbang 58.1 peratus daripada jumlah penduduk pada suku tahun ketiga 2024 (ST3 2023: 57.9%). Penduduk etnik Cina dan India masing-masing menurun kepada 22.4 peratus dan 6.5 peratus berbanding 22.5 peratus dan 6.6 peratus, sementara Bumiputera Lain kekal tidak berubah iaitu 12.3 peratus pada tempoh yang sama. Bumiputera Lain terdiri daripada Bumiputera Sabah, Bumiputera Sarawak dan Bumiputera Semenanjung Malaysia lain. Bumiputera Sabah menyumbang 56.6 peratus daripada Bumiputera Lain yang terdiri daripada Kadazan/ Dusun (31.7%), Bajau (26.5%), Murut (5.1%) dan Bumiputera Sabah lain (36.7%). Sementara itu, Bumiputera Sarawak (32.4%) terdiri daripada Iban (59.1%), Bidayuh (17.1%), Melanau (10.6%) dan Bumiputera Sarawak lain (13.2%).

Beliau turut menyatakan, “Jumlah kelahiran hidup merekodkan penurunan sebanyak 12.3 peratus (100,645 kelahiran) berbanding 114,764 kelahiran pada suku tahun ketiga 2023. Bayi lelaki melebihi bayi perempuan dengan 51,815 kelahiran berbanding 48,830 kelahiran. Nisbah jantina bagi kelahiran hidup ialah 106 lelaki bagi setiap 100 perempuan. Selangor mencatatkan bilangan kelahiran hidup tertinggi iaitu 19,458 (19.3%) manakala kelahiran hidup terendah dicatatkan di Wilayah Persekutuan Labuan (327 kelahiran: 0.3%). Ibu berumur 30-39 tahun merekodkan kelahiran hidup tertinggi iaitu 50,670 (50.3%) pada suku tahun ini, diikuti oleh ibu berumur 20-29 tahun (42.6%), 40 tahun dan lebih (5.0%) dan kurang daripada 20 tahun (2.1%). Secara purata seorang bayi dilahirkan pada setiap minit, 46 bayi bagi setiap jam dan 1,094 bayi sehari pada suku tahun ketiga 2024”.

Melayu menyumbang 66.7 peratus (67,181 kelahiran hidup) daripada jumlah kelahiran hidup pada suku tahun ketiga 2024 (ST3 2023: 67.1%). Kelahiran hidup bagi etnik Cina dan Bumiputera Lain masing-masing meningkat kepada 10.4 peratus dan 13.0 peratus berbanding 9.7 peratus dan 12.8 peratus pada suku tahun ketiga 2023. Sementara itu, etnik India menurun kepada 3.8 peratus berbanding 4.4 peratus pada suku tahun ketiga 2023. Bumiputera Sabah menyumbang 58.5 peratus daripada Bumiputera Lain yang terdiri daripada Kadazan/ Dusun (34.2%), Bajau (30.7%),

Murut (6.6%) dan Bumiputera Sabah lain (28.5%). Sementara itu, Bumiputera Sarawak (34.4%) terdiri daripada Iban (58.8%), Bidayuh (17.3%), Melanau (12.2%) dan Bumiputera Sarawak lain (11.7%).


Mengulas lanjut, sebanyak 48,317 kematian telah direkodkan pada suku tahun ketiga 2024, meningkat sebanyak 1.9 peratus berbanding suku tahun ketiga 2023 (47,438 kematian). Bilangan kematian bagi lelaki adalah 27,446 manakala 20,871 kematian bagi perempuan. Nisbah jantina bagi kematian ialah 132 lelaki bagi setiap 100 perempuan. Pada tempoh masa yang sama, Selangor merekodkan bilangan kematian tertinggi iaitu 7,660 kematian (15.9%) manakala Wilayah Persekutuan Putrajaya mencatatkan bilangan kematian terendah dengan 79 kematian (0.2%). Kumpulan umur 60 tahun dan lebih merekodkan bilangan tertinggi iaitu 33,995 kematian (70.4%), diikuti 41-59 tahun (20.0%), 15-40 tahun (7.5%) dan 0-14 tahun (2.2%). Secara purata, satu kematian direkodkan pada setiap dua minit, manakala 22 kematian direkodkan setiap jam dan 525 kematian sehari pada suku tahun ketiga 2024.

Pada suku tahun ketiga 2024, Melayu menyumbang 52.1 peratus (25,153 kematian) daripada jumlah kematian (ST3 2023: 51.2%). Kematian bagi etnik Cina kekal tidak berubah iaitu 26.4 peratus pada suku tahun ketiga 2024. Sementara itu, etnik India dan Bumiputera Lain masing-masing menurun kepada 8.3 peratus dan 10.5 peratus berbanding 8.4 peratus dan 11.1 peratus pada suku ketiga 2023. Bumiputera Sabah menyumbang 51.1 peratus daripada Bumiputera Lain yang terdiri daripada Kadazan/ Dusun (39.7%), Bajau (26.5%), Murut (5.5%) dan Bumiputera Sabah lain (28.3%). Sementara itu, Bumiputera Sarawak (42.3%) terdiri daripada Iban (62.9%), Bidayuh (15.7%), Melanau (10.4%) dan Bumiputera Sarawak lain (11.0%).

Jabatan Perangkaan Malaysia (DOSM) telah melancarkan OpenDOSM NextGen sebagai medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Kerajaan Malaysia telah mengisytiharkan Hari Statistik Negara (MyStats Day) pada 20 Oktober. Tema sambutan MyStats Day adalah “Statistik Nadi Kehidupan”. DOSM menyambut ulang tahun ke-75 Jubli Intan pada tahun 2024.


Carta 1: Kelahiran hidup dan kematian (bilangan dan kadar) mengikut suku tahun, 2010-2024^p, Malaysia




Jadual 1: Statistik Demografi bagi suku tahun ketiga, 2023 dan 2024, Malaysia

Tahun	Jumlah		Lelaki		Perempuan	
	ST3 2023	ST3 2024	ST3 2023	ST3 2024	ST3 2023	ST3 2024
Penduduk (juta)	33.6	34.1	17.6	17.9	16.0	16.2
Kelahiran hidup	114,764	100,645	59,683	51,815	55,081	48,830
Kematian	47,438	48,317	27,044	27,446	20,394	20,871


Carta 2: Penduduk Warganegara mengikut kumpulan etnik, suku tahun ketiga 2023 dan 2024, Malaysia




Carta 3: Kelahiran hidup mengikut kumpulan etnik, suku tahun ketiga 2023 dan 2024, Malaysia



Carta 4: Kematian mengikut kumpulan etnik, suku tahun ketiga 2023 dan 2024, Malaysia



Carta 5: Transisi Demografi Malaysia, 1911-2023



Dikeluarkan oleh:

**PEJABAT KETUA PERANGKAWAN
JABATAN PERANGKAWAN MALAYSIA
13 NOVEMBER 2024**